



PYETJE & PERGJIGJE

okultizmi

Çfarë mendoni për horoskopin? Ka njerëz që i drejtojnë jetët e tyre sipas asaj që ai thotë. A është e gabuar që nganjëherë të lexoj shenjë time të horoskopit?

Bibla ka shumë për të thënë rreth horoskopeve (skica të pozicioneve të yjeve dhe planetëve). Siç mund ta dini, horoskopi përfshin orbitën vjetore të diellit sikurse shfaqet në marrëdhënie të ndryshme me yjësi të ndryshme. Kjo ndahet në dymbëdhjetë shenja, ku çdo shenjtë është emërtuar sipas grupeve të ndryshme të yjeve. Këto dymbëdhjetë shenja quhen shenjat e zodiakut.

Sigurisht, nuk ka asnjë bazë shkencore për pohimin se pozicioni i planetëve dhe i yjeve ndikon ose përcakton fatin tonë. Njerëzit thonë se horoskopi nuk është fetar. Ata që thonë kështu janë ose të mashtruar ose mashtrues. Në mënyrë të përsëritur Bibla e lidh astrologjinë me adhurimin pagan. Në Ligjin e Përtërirë 18:9-14, Perëndia na thotë se këto gjëra janë një neveri për Të. Ai i urren ato. Astrologjia është fe dhe jo shkencë dhe nuk duhet të ngatërrohet me shkencën e pranueshme që quhet astronomi.

Joshja e horoskopit është premtimi i astrologëve se horoskopi të tregon se çfarë njeriu je dhe parashikon ndodhi në jetën tuaj të përditshme.

Prandaj, a është e gabuar t'i hedh një sy horoskopit tim në gazetë ose të blej një revistë të vogël me horoskopin vjetor? Bibla na thotë se kjo është e gabuar. Kjo nuk ka jep të vërtetën, por mashtrimin. Kjo fillon si flirtim dhe na çon në skllavërim. Shumë njerëz sot nuk do të bëjnë asgjë pa lexuar më parë horoskopin apo pa telefonuar një psikik.

Dëgjoni Moisiun duke i paralajmëruar izraelitët në Ligjin e Përtërirë 4:19: **“Tregoni kujdes [...] sepse duke ngritur sytë në qiell dhe duke parë diellin, hënën, yjet, të tëra, domethënë tërë ushtrinë qiellore, ti të mos nxitesh të biesh përmbys përpara këtyre gjërave dhe t'u shërbesh”**.

Kur Isaia parashikoi zemërimin e Perëndisë kundër Babilonisë, ai talli haptas fenë e tyre pagane: **“Le të ngrihen, pra, astrologët, ata që studiojnë yjet dhe bëjnë parashikime çdo muaj dhe le të shpëtojnë nga gjërat që do të bien në kurriz. Ja, ata do të jenë si kashta; zjarri do t'i harxhojë. Nuk do të shpëtojnë veten e tyre nga fuqia e flakë”** (Isaia 47:13-14).

Cili duhet të jetë qëndrimi ynë ndaj horoskopit (apo atyre parashikuesve që dalin drejtpërdrejt në televizor)? Jeremia tha: **“Kështu thotë Zoti: ‘Mos mësoni të ndiqni rrugën e kombeve dhe mos kini frikë nga shenjat e qiellit, sepse janë kombet që kanë frikë prej tyre”** (Jeremia

10:2). A është kjo mjaft e qartë? Mos e shiko, mos e heto, mos e lexo, mos e dëgjo, as mos ëndërro rreth horoskopit të përditshëm. Dhe mos ki frikë se mos humbet ndonjë paralajmërim të rëndësishëm a ndonjë këshillë.

Jo vetëm kaq, por sa mirë të jemi si Danieli, i cili e studionte Fjalën e Perëndisë për udhëheqje në jetë. Danieli 1:20 na thotë se **“...mbi çdo çështje që kërkonte dituri dhe gjykim dhe për të cilat mund t’i pyeste mbreti, i gjeti (Danielin dhe shokët e tij) dhjetë herë më lart tërë magjistarët dhe astrologët”**.